

Landesbibliothek Oldenburg

Digitalisierung von Drucken

Discovrs Av Roy Svr La Trefve De L'An M. D. LV.

Du Bellay, Joachim

Paris, 1561

Execration Svr L'Angleterre.

urn:nbn:de:gbv:45:1-2865

De ceux-là que i'entens, vous soient à ceste fois
Par toutes maudissons & execrables loix,
Vouez & consacrez, ie les consacre & uouë,
Et du uœu que ie fais, la France m'en auouë.

Ie les consacre donc pour le bien de mon Roy,
Pour tous ses alliez, pour la France & pour moy:
Afin que tout le mal, l'orage, la tempeste,
Qui nous peult menacer, tombe dessus leur teste:
Que nous demeurions saüfs, nos femmes, nos enfans:
Que nous en retournions uainqueurs & triomphans,
Et chargez de butin, & que nostre uictoire
Soit pour iamais sacree au temple de Memoire:
Qu'Angleterre, & sa Royne, & tous ses alliez
Ayans les bras au dos honteusement liez,
Marchent la teste bas prisonniers de mon Prince:
Que tributaire soit à iamais leur prouince,
Et regnent à iamais nos enfans & nepueux
Sur les fils de leurs fils, & ceux qui naistront d'eux.

Si vous faictes ainsi Stryx, Acheron, Cocyte,
L'Erebe, le Chaos, & tout ce qui habite
A la gueule l'enfer, la rage, la fureur,
Et tout ce qui est plein d'une eternelle horreur,
Ie vous promets & uouë, à la mode Romaine,
Immoler trois aigneaux frisez de noire laine.

E I N.

C ij





LES FVRIES CONTRE
LES INFRACTEURS
DE FOY.

PAR IOACH. DVBELLAY ANG.

Lors que du pere occis l'ombre si mal uengée,
Au plus profond de Styx pour ses forsaicts
plongée,
Sceut l'infame traicté, & la periure foy,
Qui pour suyure Cesar a fait laisser le Roy,
Elle arracha sa barbe, & de fureur contrainte
Tirant son chef de l'eau fait ainsi sa complainte,
Enfans, que pour enfans ie n'auouërây, sinon
Que uos faicts malheureux sont dignes de mon nom:
Estoit-ce donques là ceste belle uengence,
Dont uous deuies donner à ma mort allegence?
Est-ce là la pitié, que le deuoir commun,
Et nature ont grauee en l'ame d'un chacun,
De conseruer la uie à qui nous l'a donnée?
Loy des Dieux immortels aux hommes ordonnée.
Si lasches uous craignies de tomber au danger
De uostre propre mort pour la mienne uenger,
Deuies uous, malheureux, pour croistre uostre terre
Changer en paix honteuse une honnorable guerre?